



五言古詩卷之十八

唐詩品彙十八

新寧高棟編

接武上

德宗皇帝

中和節賜百官燕集因示所懷

至化恒在宥保和茲息人推誠撫諸夏與物長為春
仲月風景煖禁城老柳新芳時協金奏賜宴同群臣
絲竹豈云樂忠賢唯所親庶洽朝野意曠然天下均

重陽燕

早依對庭燎躬化勤意誠時此萬機暇適興佳節并

曲池潔寒流芳菊舒金英乾坤爽氣滿臺殿秋老清
朝野慶年豐高會多歡聲永懷無荒戒良士同私情
九月十八賜百寮追賞因書所懷

雨霽霜氣肅天高雲日明繁林已墜葉寒菊仍舒榮
懿此秋節時更延追賞情池臺列廣宴絲竹傳新聲
至樂非外獎浹歡同中誠庶敦朝野意永使風化清

送張封建還鎮

牧守寄所重才賢生為時宣風自淮甸授鉞膺藩籬
入覲展遐戀臨軒慰來思忠誠在方寸感激陳情詞
報國爾所向恤人予是資歡宴不盡懷車馬當還期

穀雨將應候行春猶未遲勿以千里遙而云無已知

玄宗皇帝

鶴鶴頌

俯同魏光乘作

朕之兄弟唯有五人比為方伯歲一朝見雖載崇
藩屏而有睽談笑是以輟牧人而各守京職每聽
政之後延入宮掖申友于之志詠常棣之詩邕邕
如怡怡如展天倫之愛也秋九月辛酉有鶴鶴千
數栖集於麟德之庭樹竟旬焉飛鳴行搖得在原
之趣昆季相樂縱目而觀者久之逼之不懼翔集
自若朕以為常鳥無所志懷左清道率府長史魏

光乘才雄白鳳辯壯碧鷄以其宏達博識負至軒
檻預觀其事以獻其頌夫頌者所以揄揚德業褒
讚成功願循虛昧誠有負矣美其彬蔚俯同頌云
伊我軒宮竒樹青葱藹周廬兮冒霜停雪以茂以悅
恣卷舒兮連枝同榮吐綠含英曜春初兮尊收御節
寒露微結氣清虛兮桂宮蘭殿唯所息宴栖雍渠兮
行搖飛鳴急難有情情有餘兮願惟德涼夙夜兢惶
慙化踈兮上之所教下之所效實在予兮天倫之性
魯衛分政親賢居兮爰遊爰處爰笑爰語巡庭除兮
觀此翔禽以悅我心良史書兮

郎士元

高仲武云士元河岳英竒人倫秀異自家
刑國遂擁大名右丞以往與錢更長郎公
稍更閑雅
近於康樂

相夫人詠二首

蛾眉對湘水遙笑蒼梧山萬乘既已沒孤舟誰忍還
至今楚山上猶有淚痕斑

南望涔陽路渺渺多新愁桂酒神降時回風江上秋
彩雲忽無處碧水空安流

詠二十八秀才見寄

昨夜山月好故人来新思清光到枕上嫋嫋涼風時

永意能在我惜無携手期

宿判官江樓

適楚豈吾願思歸秋向深故人江樓月永夜千里心
葉落攪鄉夢烏啼驚越吟窸窣更何有斷續空城砧
贈萬生下第還吳

直道多不偶美才應息機霸陵春欲暮雲海獨言歸
為客成白首入門嗟布衣尊羨若可意暫出掩柴扉

關羽祠送高員外還荊州

將軍稟天姿義勇冠今昔走馬百戰場一劍萬人敵
誰為感恩者竟是思歸客流落荆巫間徘徊故鄉隔

離筵對祠宇灑酒暮天碧去去勿復言嗚悲向陳迹

題劉相公三湘圖

昔日到衡霍迺來憶南州今朝平津邸兼得瀟湘遊
稍辯郢門樹依然芳杜洲微明三巴峽咫尺萬里流
飛鳥不知倦遠帆生暮愁洛陽指天末比渚空悠悠
枕上見漁父坐中常狎鷗誰言魏關下自有東山幽

皇甫冉

高仲武云晉宋齊梁以來採掇者無數而
補闕獨獲驪珠使前賢失步後輩却立自
非天假何以達斯長轡
未騁芳蘭早凋悲夫

出塞

吹角出塞門前瞻即胡地三軍盡回首皆灑望鄉淚
轉念關山長行看風景異由來征戍客各負輕生義

訓裴十四

淮海各聯翩三年方一見素心終不易玄髮何須變
舊國想平陵春山滿陽羨隣雞莫遽唱共惜良夜燹
之京留別劉方平

客子慕儔侶含悽整朝裝邀歡日不足况乃前期長
離袂惜嘉月遠還勞折芳遲回越二陵回首但蒼蒼
喬木清宿雨故關愁夕陽人言長安樂其奈緬相望

題裴二十一新園

東郭訪先生西郊尋隱路久為江南客自有雲陽樹
已得閑園心不知公府步閉門白日晚倚杖青山暮
果熟任霜封籬踈從水度窮年常牽綴往事惜淪誤
唯見偶耕人朝朝自來去

李端

古別離

水國葉黃時洞庭霜落夜行舟問商賈宿在楓林下
此地送君還茫茫似夢間後期知幾日前路轉多山
巫峽通湘浦迢迢隔雲雨天晴見海檣日落聞津鼓
人老自多愁水深難急流清宵歌一曲白首對汀洲

留別柳仲庸

惆悵流水時蕭條背城路離人出古亭嘶馬入寒樹
江海止風波相逢在何處

野亭三韵送錢貞外

野菊開欲稀寒泉流漸淺幽人步林後嘆此年華晚
倚杖送行雲尋思故山遠

歸山招王達

日長原野靜杖策步幽巘雉鳩麥苗陰蝶飛溪草晚
我生好閑放此去殊未返自是君不來非閑去山遠
適谷口元贊善所居

入谷訪君來秋泉已堪涉林間人獨坐月下出相接
重露濕蒼苔明燈照黃葉故交一不見素髮何稠疊

盧綸

大白西峰偶宿書懷

弱齡兼昧鄙遇勝唯求止如何羈旅中得步青冥裏
青冥有佳轂水雪兩仙翁毛節未歸海丹梯間倚空
逍遙擬上清洞府不知名醮罷雨當至客辭山忽明
山明鳥聲樂日氣生石壑石壑樹條條白雲如水流
白雲消散盡壠埃儼然秋積阻山河固縣聯烽戍稠
五雲承廣略四野失邊愁吁嗟繫塵沒又負靈山迹

芝求自芳香塵沙幾沉溺書此欲沾衣平生事每違
烟霄不可仰鸞鶴任追隨

送吉中孚歸楚州舊山

青袍共閤郎談笑挹侯王舊錄藏雲穴新詩滿帝鄉
名高閑不得到處人爭識誰知冰雪顏已禿風塵色
此去復如何東臯岐路多藉茆臨紫陌回首境滄波
年來倦蕭索但說淮南樂並檝湖中遊連檣月下泊
泓溜入閭門千燈夜市喧喜逢隣舍伴遙語問鄉園
下淮風自急樹杪分郊色送客隨岸行離人出舫立
漁村遶水田澹浦隔晴烟欲就林中醉先期石上眠

林昏天未曙且向雲邊去暗入無路上心知有蒼處
登高日轉明下望見春城洞裏草空長塚邊人自耕
寥寥行異境過盡千峰影露色凝古壇泉聲落寒井
仙成不可期多別自堪悲為氣樵源客何人見亂時
送顧秘書歸岳州

黃葉落不盡蒼苔隨雨生當軒置尊酒送客歸江城
竹裏聞機杼舟中見弟兄岳陽賢太守應為改鄉名
上巳日陪齊相公花樓宴

鍾陵暮春月飛觀延群英晨霞耀中軒滿席羅金瓊
持盃凝遠睇觸物結幽情樹色參差綠湖光潏灩明

禮卑瞻絳帳恩浹厠華纓徒記山陰興今日乃為榮
和季中丞酬萬年房少府過汾洲景雲觀

因以寄

房季早年同居此觀

顯晦澹無跡賢哉常晏如如何驚孤鶴忽乃得雙魚
叙以泉石舊悵然風景餘低徊青油幕夢寐白雲居
玉洞桂香滿雪壇松影踈沉思矚仙侶紆組正軍書
積學早成道感恩難遂初梅生諒多感歸止豈吾盧

與張擢對酌

擢當作濯

張翁對盧叟一榼山村酒傾酒請予歌忽蒙張翁呵
呵余官非屈曲有怨詞多歌罷謝張翁所思殊不同

余悲方為老君責一何空曾看樂官錄向是非翁曲
張老聞此詞汪汪淚盈目盧叟醉言兼一盃凡數呼
回頭顧張老欲敢戲為儒

奉陪侍中遊石筍溪十二韻

朝日照靈山山溪浩紵錯圖書無舊記鯨禹應新鑿
雙壁瀉天河一峯吐蓮萼潭心亂雪卷岩腹繁珠落
彩蛤攢錦囊芳蘿媚蒼索猿群曝暘嶺龍冗腥陰壑
靜得漁者言閑聞祠仙博歌松倚朱幃廣石屯油幘
國泰事留戾山春縱康樂間關誰狀鳥爛熳無名藥
欲驗少君方長吟大隱作旌幢不可駐古塞新沙漠

司空曙

關山月

蒼茫明月上夜久光如積野漠冷胡霜關樓宿遠客
隴頭秋露暗磧外寒沙白唯有故鄉人
露裳此聞笛
令孤峒

硤州旅舍懷蘇州韋郎中

儒服學從政遂為塵事嬰
命東渡西孰堪異鄉情
懷祿且懷思策名敢逃名
羨彼農畝人白首新交并
江山入秋問草木彫晚榮
芳塘寒露凝旅館涼飈生
懿交守東吳夢想聞頌聲
雲水方浩浩離憂何時平

朱長文

宿新安江深渡館寄鄭州王使君

霜飛十月中搖落衆山空
孤館閉寒水大江生夜風
賦詩清有意沈約在關東

余延壽

南州行

搖艇至南國國門連大江
中洲兩邊岸數步一垂楊
金釧越溪女羅衣胡粉香
織綠春卷幔採蕨瞑提筐
弄瑟嬌垂幌迎人咲下堂
河頭浣衣處無數紫死央
折楊柳

天道連國門東西種楊柳歲經君不見
袅娜垂來久
綠枝栖暝禽雄去雌獨吟餘花怨春盡
微月起秋陰
坐望窻中蝶起攀枝上葉好風吹長枝
婀娜何如妾
妾見柳園新高樓四五春莫吹胡塞曲
愁殺隴頭人

顧况

皇甫湜序畧云吳中山水氣象君居吳中
長於逸詩往往若穿天心出月脅意外驚
人語非尋常
所能及也

擬古

龍劍昔藏影送雄留其雌人生阻懽會
神物亦別離
碧樹感秋落佳人無還期夜琴為君咽
浮雲為君滋

愛而傷不見星漢徒參差

棄婦詞

古人雖棄婦棄婦有歸處今日妾辭君
辭君欲何去
本家零落盡慟哭來時路憶昔未嫁君
聞君甚周旋
及與同結髮值君適幽蕪孤魂託飛鳥
兩眼如流泉
流泉咽不燥萬里關山道及至見君歸
君歸妾已老
物情棄衰歇新寵方妍好拭淚出故房
傷心劇秋草
妾以憔悴捐羞將舊物還餘生欲有寄
誰肯相留連
空牀對虛牖不覺塵埃厚寒水落芙蓉
秋風墮楊柳
記得初嫁君小姑始扶床今日君棄妾
小姑如妾長

回首語小姑莫嫁如兄夫

弋陽溪中望仙人城

何草乏靈姿無山不孤絕我行雖云蹇偶勝聊換節
上界浮中流光響洞明滅晚禽曝霜羽寒魚依石髮
自有無還心隔波望松雪

嚴公釣臺作

靈芝產遐方威鳳駕重霄嚴公何耿潔託志肩夷巢
漢后雖則貴子陵不知高糠粃當世道長揖夔龍朝
掃門彼何人昇降不同朝捨舟遂長往山谷多清飈
奉同郎中韋使君郡齋雨中宴集

好鳥依嘉樹飛雨灑高城况與數君子列坐分兩楹
文雅一何麗林塘含餘清我公未歸朝遊子不待晴
白雲帝鄉遠滄江楓葉鳴拜手欲無言零淚如酒傾
寸心已摧折別離方骨驚安得凌風翰肅肅賓天京

劉太真

願十二左遷過韋蘇州房杭州韋睦州三
使君皆有郡中宴集詩辭意高麗鄙夫人
之所仰慕願生既至留連笑語因以成篇
以繼三君子之風

寵至乃不驚罪及非無由奔迸歷畏途緬邈赴遐陬

牧此彫弊昨屬當賦歛秋夙興諒無補旬暇焉敢休
前日懷友生獨登城上樓迢迢西北望遠思不可收
今日車騎來曠然消人憂晨迎東齋飯晚渡南溪遊
以我碧流水泊君清幹舟莫將遷客程不為勝境留
飛札謝三守斯篇希見訓

朱倣

剡溪行却寄新別者

潺湲寒溪上自此成別離迴首望歸人移舟逢暮雪
頻行識草樹漸老傷年髮唯有白雲心為向東山月

竇參

高仲武云竇君詩亦祖沈千運
比之孟雲卿尚在廊廡之間矣

遷謫江表久未歸

自經放逐徘徊無所從便為寒山雲不得隨飛龍
名豈不欲得歸豈不欲早若無三月資難適千里道
離心與羈思終日常草草人生能幾齊憂苦則先老
誰能假羽翼使我傷懷抱

登潛山觀

山勢欲相抱一條微逕盤攀蘿歇復行始得凌仙壇
聞道葛夫子此中煉還丹丹成五色光服之生羽翰
靈草空自翠餘霞誰共飡至今步虛處猶有孤飛鸞

幽幽古殿門下壓浮雲端萬丈水聲落四時松色寒
既入無何鄉轉嫌人事難終當還塵俗高卧從所安

姚係

京口遇舊識兼送往隴州

蟬鳴一何急日暮秋風樹即此不勝愁隴陰人更去
相逢與相失共是忘羊路

五老峯大明觀贈隱者

雲觀此山北與君携手稀林端涉橫水洞口入斜暉
乍見鸞鶴邈忽為烟霧飛故人清和客默會琴心微
丹術幸可授青龍當未歸悠悠半生意此日復相違

送周愿判官歸嶺南

早蟬望秋鳴夜琴怨離轂眇然多異感值子江山行
由來重義人感激事縱橫往復念遐阻淹留慕平生
晨奔九衢餞暮始萬里程山驛風月榭海門烟霧城
易綃泉源近拾翠沙渚明蘭蕙一為贈貧交空復情

劉灣

出塞曲

將軍在重圍音信絕不通羽書如流星飛入甘泉宮
倚是并州兒少年心膽雄一朝隨召募百戰爭王公
去年棄乾北今年棄乾東死是征人死功是將軍功

汗馬牧秋月疲卒卧霜風仍聞左賢王更欲圖雲中

李陵別蘇武

漢武愛邊功李陵提步卒轉戰單于庭身隨漢軍沒
李陵不愛死心存歸漢關誓欲還國恩不為匈奴屈
身辱家已無長居虎狼窟胡天無春風虜地多積雪
窮陰愁殺人况與蘇武別發聲天地哀執手肺腸絕
白日為我愁陰雲為我結生為漢宮臣死為胡地骨
萬里長相思終身望南月

李希仲

仲武中興間氣集評希仲詩云殊輕靡然前軍飛鳥落格鬪塵沙昏亦出塞實錄疊疊不絕者可及于中矣

薊門行

旄頭有精芒胡騎徭秋草羽檄南渡河邊庭用兵早
漢家愛征戰宿將今已老辛苦羽林兒從戎榆關道

又

一身救邊速烽火連薊門前軍飛鳥落格鬪塵沙昏
寒入鼓鼙急單于將夜奔當須徇忠節身死報國恩

蘇渙

杜甫稱其詩以為渙思慮出書篋九杖之外隱隱留金石聲云

變律

養蚕為素絲葉盡蚕亦老傾筐對空林此意向誰道

一女不得織萬夫受其寒一夫不得意四海行路難
禍亦不在大福亦不在先世路險孟門吾徒當勉旃
戎昱

塞上 二首

慘慘寒日沒北風卷蓬根將軍領疲兵却入古塞門
迴首指陰山殺氣成黃雲

樓上畫角哀即知兵心苦試問左右人無言淚如雨
何意休明時終年事鼙鼓

從軍行

昔從李都尉雙鞬照馬蹄擒生黑山北殺敵黃雲西

太白沉虜地邊草度萋萋歸來邯鄲市百尺青樓梯
感激然諾重平生膽力齊芳筵暮歌發艷粉輕鬟低
半酣秋風起鐵騎門前嘶遠戎報烽火孤城嚴鼓鼙
揮鞭望塵去少婦莫含啼

苦哉行

妾家清河邊七葉承貂蟬身為最小女偏得渾家憐
親戚不相識幽閨十五年有時最遠出祇到中門前
去年狂胡來懼死翻生全今秋官軍至百步牛羊羶
脫身出虎口不及歸菑泉苦哉難重陳暗哭蒼蒼天

長安秋夜

八月更漏長愁人起常早閉門寂無事滿院生秋草
昨夜西牕夢夢行荆南道遠客歸去來在家貧亦好

湖南雪中留別

草草還市市湖南別離早何處愁殺人歸鞍雪中道
出門迷轍跡雲水白浩浩明月武陵西相思鬢堪老
同辛兗州巢父盧副端岳相思獻酬之作
因紆歸懷兼呈辛魏二院長楊長寧

暮角發高城情人坐中起臨觴不及醉分散秋風裏
雖有明月期離心若千里前歡反惆悵後會還如此
焉得夜淹留一回終宴喜羈遊度率役館至重湖水

早晚泛歸舟吾從數君子

撫州處士湖泛舟送北廻兩指此南昌縣

查溪蘭若別

移罇鋪山曲祖帳查溪陰鋪山即遠道查溪非故林
悽然誦新詩落淚霑素襟郡政我何有別情君獨深
禪庭古樹秋宿雨清沉沉揮袂故里遠悲傷去住心

李益

大曆以後嚴滄浪
深取者李益耳

觀回軍

行行上隴頭隴月暗悠悠萬里將軍沒回旂隴戍秋

誰令嗚咽水重入故營流

入南山至全師蘭若

木墮水歸壑杳然無念心南行有真子被褐息山陰
石路瑤草散松門寒景深吾師亦何授自起定中吟

送諸暨王主簿之任

別愁已萬緒離曲方三奏遠宦亦辭鄉南天異風候
秦城歲方老越國春山秀落日望寒濤公門閑清晝
何用慰相思裁衣寄關右

聞亡友王七嘉禾寺得素琴

故人昔此去留琴明月前今來我訪舊泪洒白雲天

詎欲匣孤響送君歸夜泉撫琴猶可絕况此故無絃
何必雍門爽然後使潺湲

送遼陽使還軍

征人歌且行北去遼陽城二月戎馬息悠悠邊草生
青山出塞斷代地入雲平昔者匈奴戰多聞殺漢兵
平生報國憤日夜角弓鳴勉君萬里去勿使虜塵驚

華山南廟

陰山臨古道古廟閉山碧落日春草中蹇芳薦瑤席
明靈達精意髣髴如不隔岩雨神降時回飈入松栢
常聞坑儒後此地返秦壁自古害忠良神其輔宗祐

將赴朔方早發漢武

弭蓋出故關窮秋首邊路問我此何為平生重一顧
風吹山下草繫馬河邊樹奉役良有期回瞻終未屢
去鄉幸未遠戍衣今已故豈惟幽朔寒念我機中素
去已勿復言所酬知者遇

五言古詩卷之十八

唐詩品彙十八

五言古詩卷之十九

唐詩品彙十九

新寧高棟編

接武下

于鵠

秦越人洞中詠

扁鵲得仙處傳是西南峯年年山下人長見騎白龍
洞門黑無底日夜唯雷風清齋將入時戴卷兼抱松
石逕陰且寒地響知遠鍾似行山林外聞乘屐聲重
低礙更俯身漸遠晝夜同時時白蝙蝠飛入茅衣中
行久路轉窄靜聞水淙淙但願逢一人自得朝天宮

宿西山修下元齋咏

幽人在何處松檜深冥冥西峯望紫雲知有安期生
沐浴溪水暖新衣禮仙名脫屣入靜堂遶像隨禮行
碧紗籠寒燈長幡綴金鈴林下聽法人起聞枯葉聲
啓奏修律儀天曙山鳥鳴分行布管芳列坐滿中庭
持齋候撞鍾玉函散寶經焚香開卷時照耀金室明
投簡石洞深稱過上帝靈學道能苦心自古無不成

入白芝尋黃尊師

觸烟入溪口茫茫唯檉檉其中飛碧流十里不通屐
出林尚未明細經懸峭壁把藤借行勢光滑復徠跡

忽然風景異乃到神仙宅天晴茅屋頭殘雪蒸氣白
隔窓梳髮聲久立聞吹幘把琴出門來不是人間客
幽院無灑掃四時自虛寂落葉埋長松出地纔數尺
曾讀上清經去住長生籍願示不死方何山有瓊液
過凌霄斷天謁張先生祠

落落萬峯裏一峯獨凌天下看如尖高上有十里天
至人愛幽深一住五十年懸牘到其上弃牛畔藥田
衣食不下求乃是雲中仙山僧獨知處相引衝碧烟
斷崖晝昏黑槎泉橫雙椽面壁攀石稜養力方敢前
累歇日初沒始到茆堂邊見客不問誰禮質無周旋

醉卧枕歌樹坐寒展青氈折松掃藜牀秋菓顏色鮮
白犬舐客衣驚走聞腥羶乃知軒冕徒寧比雲壑眠

戴叔倫

劉須溪云
務公諸詩
短處更深
長處愈淺

獨不見

前宮路非遠舊苑春將徧玉戶看早梅彫梁數歸燕
身輕逐舞袖香暖傳歌扇自和秋風詞長侍昭陽殿
誰信後庭人年年獨不見

去婦怨

出婦不敢啼風悲日悽悽心知恩義絕誰忍分明別

下坂車鞿鞿畏逢鄉里親空持床前幔却寄家中人
忽辭王吉去爲是秋胡死欲比今日情煩冤不相似

潭州使院書情寄江夏賀蘭副端

雲雨一蕭散悠悠關渡河俱從泛舟役近隔洞庭波
春水去不盡秋風今又過無因得相見却恨寄書多

新秋夜寄江右友人

遙夜獨不寐寂寥蓬戶中河明五陵上月滿九門東
萬里親友散故園江海空懷歸正南望此夕起秋風

長孫佐輔

隴西行

陰雲凝朔氣隴上正飛雪四月草不生北風勁如割
朝來羽書急夜宿長城窟道隘行不前相呼抱鞍歇
人閑指欲墮馬凍蹄皆裂射鷹旋充饑斧冰還止渴
寧辭解圍鬪但恐乘疲沒早晚邊候空歸來養辛

關山月

悽悽還切切戍客多離別何處最傷心關山見秋月
關月竟如何由來遠近過始經玄兔寒終照白狼河
忽憶秦樓婦流光應共有已得竝蛾眉還知攬纖手
去歲照同行比翼度連形今宵照獨立顧影自皚皚
餘輝漸西落夜夜看如昨借問映旌旗何如鑿帷幙

拂曉朔風悲蓬驚鷹不飛幾時征戍罷還向月中歸

山行經村徑

一徑有人迹到來惟數家依稀聽機杼寂歷看桑麻
雨濕渡頭草風吹墳上蒼却驅羸馬去數點歸林鴉

山居

看書愛幽寂結宇青冥間飛泉引風聽古桂和雲攀
地深草木稠境靜魚鳥閒陰氣晚出谷朝光先照山
有時獨杖藜入夜猶啓關星昏歸鳥過火出樵童還
神體自和志不是離人還

楚州鹽埭古墻望海

唐詩十九卷
風三
混沌本冥冥泄為洪川流雄哉大造化萬古橫中州
我從西北來登高望蓬丘陰晴乍開合天地相浮沉
長風卷繁雲日出扶桑頭水淨露鮫室烟銷凝蜃樓
時來會雲翔道蹇即津遊明發促歸軫滄波非宿謀

山行書事

日落風颼颼驅車行遠郊中心有所悲古墓守黃茅
茅中狐兔窠四面鳥鳶巢鬼火時獨出人烟不相交
行行近林村一徑歌還切迎霜聽蟋蟀向月看蟪蛄
翁喜客來坐客來羞廚庖濁醪誇潑螳時菓仍新苞
相勸對寒燈呼兒爇枯樵雅朴頗近古其言無斗筭

憂歡世上并歲月途中拋誰知問津客空作楊雄嘲

楊凌

奉訓韋滁州寄示

淮陽為郡暇坐惜流芳歇散懷累榭風清暑澄潭月
陪煖辭三楚戒途縣百越非當遠別離雅奏何由發

崔元翰

奉和聖製中元日題奉敬寺

紗道非本說殊途成異名聖人得其要俱以化群生
鳳吹從上苑龍宮連外城花鬢列後殿雲早駐前庭
松竹含新秋軒窓有餘清緬懷空同事須繼簫管聲

離想境都忘言理更精域中信稱大天下乃為輕
屈已由濟物堯心豈所榮

劉商

銅雀妓

魏主矜蛾眉美人美如玉高堂無晝夜歌舞竟未足
盛色如轉圜夕陽落深谷仍令身沒後尚足平生欲
紅粉橫淚痕調絃向空屋舉頭君不在唯見西陵木
玉輦豈再來嬌鬟為誰綠那堪秋風裏更舞陽春曲
曲罷情不勝凭闌向西哭堂邊生野草來去胷羅縠

楊衡

盧十五竹亭送姪傅歸山

落葉寒擁壁清霜夜沾石正是憶山時復送歸山客
殷勤一尊酒曉月當窓白

寄贈田倉曹灣

芳蘭媚庭除灼灼紅英舒身為陋巷客門有絳轅車
朝覽夷吾傳暮習潁陽書眄雲高羽翼待價蘊璠璣
纓弁雖云阻音塵豈度踈若因風雨晦應念宋寒居

題玄和師仙藥室

山邊蕭寥室石掩浮雲扃遶室唯有路松烟深冥冥
入松汲寒水對鶴開仙經石几香未盡木花風吹零

何年去華表幾度窮滄溟却顧宦遊子眇如霜中螢
九日陪樊尚書龍山宴集

孟嘉從藁地千乘復登臨緣危陟高步憑曠寫幽襟
黃花玩初馥翠物喜盈斟雲雜組綉色樂和山水音
旆搖秋吹急筵卷夕光沉都人瞻騎火猶知隔寺深
遊陸先生故岩居

獨壑臨高嶂蒼苔絕行跡仰窺猿掛樹俯對鶴巢石
上有一岩屋相傳靈人宅深林無暘暉幽水轉終夕
秋夜閑居即事寄廬山鄭員外蜀郡待處
士

憂思繁未整良辰會無由引領遲佳音星紀縷以周
蓬閣絕華耀况乃處窮愁墜葉寒擁砌燈光夜悠悠
開琴弄清絃窺月俯澄流冉冉鴻鴈度蕭蕭惟箔秋
長懷石門咏緬慕碧鷄遊髣髴蒙顏色崇蘭隱芳洲
登紫霄峯贈黃仙師

紫霄不可涉靈峯信穹崇下有瓊樹枝上有翠髮翁
鷄鳴秋漢側日出紅霞中璨璨真仙子執旌為侍童
焚香香忘言默思含太空世華從熠燿虛室自朦朧
雲飛瓊瑤圃龜息芝蘭藜玉籙掩不開天窓微微風
茲焉語佳旨塵境亦幽通浩淼臨廣津永用挹無窮

武元衡

獨不見

荆門一柱觀楚國三休殿環佩儼神仙輝光生頽駟
春風細腰舞明月高堂宴夢澤水連雲渚宮花似霰
俄驚白日晚始悟炎涼變別岳異波潮離鴻分海縣
南北斷相聞嗟嗟獨不見

送唐君次

都門去馬嘶霸水春流淺青槐驛路直白日離亭晚
望望烟景微草色行人遠

晨興贈友

寄呈竇使君

江陵歲方晏晨起盼庭柯白露傷紅葉清風斷綠蘿
狗時真氣索念遠幽懷多宿夕東山意縱橫南浦波
有美嬋娟子百慮攢雙蛾緘情鬱不舒幽竹自駢羅
為余歌寒苦旨酒朱顏駝兩鬢倏云變一作妍鬢
倏然變功
名將奈何

旬暇西亭寄呈熊郎中副使

旬休屏戎事涼雨北窓眠一夜江城夢萬里繞山川
草木散幽氣池塘鳴早蟬妍芳落春後旅思生秋前
紅槿粲庭艷綠蒲繁渚烟行歌獨酌謔坐發朱絲絃
哀玉不可扣華觴徒湛然聞君東林卧郡閣曠周旋

酬對龍象侶灌注清冷泉如何舞礙智猶苦病牽纏
羊士諤

九月十日郡樓獨酌

掾吏當授衣郡中稀物役嘉辰悵已失殘菊為誰惜
櫺軒一尊泛天景洞虛碧暮節獨賞心寒江鳴湍石
歸期北州里舊交東山客飄蕩海雲深相思桂花白
小園春至偶書呈吏部竇郎中孟員外

松篠雖苦節冰霜慄其間欣欣發佳色如喜東風還
幽抱想前躅冥鴻度南山春臺一以眺達士亦解顏
偃息非老圃沉吟秘玄關馳暉忽度失壯歲不得閑

君子當濟物丹梯難共攀心期自有約去掃蒼苔班

權德輿

嚴滄浪云德輿却有絕似盛唐者
或有似韋蘇州者劉隨州處者

雜詩

淇水春正綠上宮蘭葉齊光風雨搖蕩鳴佩出中閨
一顧授橫波千金呈匏犀徒然路傍子恍恍復悽悽

月夜江行

扣舷不能寐浩露清衣襟彌傷孤舟夜遠結萬里心
幽興惜瑤草素懷寫鳴琴三奏月初上寂寥寒江深

豐城劍池驛

龍劍昔未發泥沙相晦藏向非張茂先孰辯斗牛光
神物不自達聖賢亦彷徨我行豐城野慷慨心內傷

渭水

呂氏年八十皤然持釣鉤意在靜天下豈惟食營丘
師臣有家法小白乃尊周日暮駐征策愛茲清渭流
晚渡楊子江却寄江南親故

返照滿寒流輕舟任搖蕩支頤見千里烟景非一狀
遠岫有無中片帆風水上天清去鳥滅浦迥寒沙漲
樹晚疊秋嵐江空翻宿浪曾中千萬慮對此一清曠
回首碧雲深佳人不可望

感寓

殘雨倦歌枕病中時序分寒虫與秋葉一夜隔窓聞
虛室對搖落晤言無與群冥心試觀化世故如絲棼
但看鳶戾天豈見山出雲一俚徒擊節朱絃秘南薰
倚梧秀朝陽上有威鳳文終待九成奏來儀瑞吾君

古意

家人強進酒酒度能忘情持杯未飲時衆感紛已盈
明月照我傍庭柯振秋聲空階白露下枕席涼風生
所思萬里餘水潤山縱橫佳期憑夢想未晚愁鷄鳴
願得一心人當年懽樂并長筵映玉俎素指彈秦箏

暇睇呈巧咲惠音激淒清此願良未果永懷空如醒
祇命赴京途次淮口因書所懷却寄使府

群公

弱植素寡偶趨時非所任感恩再登龍求友皆斷金
彪炳覩竒彩淒鏘聞雅音適欣佳期接遽嘆離思侵
靡靡遵遠道忡忡勞寸心難成獨酌謠空奏伐木吟
沉寥清冬時蕭瑟白晝陰交歡諒如昨滯念紛在今
因風試矯翼倦飛會歸林向晚清淮駛迴首楚雲深
早發杭州泛富春江寄陸三十六公祐
候曉起徒馭春江多好風白波連青雲蕩漾晨光中

四望浩無際沉憂將此同未離奔走途但恐成悲翁
俯視觸餌鱗仰目凌霄鴻纓塵日已厚心累何時空
泛泛此人世所向皆樊籠唯應杯中物醒醉皆窮通
故人玄圃姿瓊樹分青葱終當此山去共結蘭桂叢

劉禹錫

按唐史本傳云禹錫恃才而發偏心不無
怨望年益晏偃蹇寡所合乃以文章自適
晚節尤精於詩與白樂天諸人倡和白常
推為詩豪又云其詩在處有神物護持

圓扇辭

團扇復團扇奉君清暑殿秋風入庭樹從此不相見
上有乘鸞女蒼蒼虫網遍明年入懷袖別是機中練

詠古有所寄

車音想麟麟不見纂下塵可憐平陽第歌舞嬌青春
金屋容色在文園詞賦新一朝復得幸應知失意人
效阮公體

朔風悲老驥秋霜動鷲禽出門有遠道平野多層陰
滅沒馳絕塞振迅拂華林不因感衰節安能激壯心

善卷壇下作

先生見堯心相與去九有斯民既已治我得安林藪
道為自然貴石是無窮壽瑤臺在此山識者常回首
秋晚題湖城驛池上亭

秋次池上館林暉照南榮塵衣紛未解幽思浩已盈
風蓮墜故萼霜菊含晚英恨為一夕客愁聽晨鷄鳴

發華州留別張侍御

束簡下延閣買符驅短轅同人惜分袂結念醉芳樽
切切別絃思蕭蕭征馬煩臨岐無限意相見却忘言
登陝州城小樓却憶京師親友

獨上百尺樓目窮思亦愁初日遍露草野思光悠悠
塵息長道白林清宿烟回首雲深處永懷帝鄉遊

登蘇州後登虎丘寺望海樓

獨宿望海樓夜深珍冰冷僧房已閉戶山月方出嶺

唐詩十九卷
風二十九
碧池涵劍彩寶刹搖星影却憶郡齋中虛眠此時景
歲杪將發楚州呈樂天

楚澤雪初霽楚城春欲歸清淮變寒色遠樹含清暉
原野已多思風霜潛滅威與君同旅鴈向此刷毛衣
別友人後得書因以詩贈

前時送君去揮手青門橋路轉不相見猶聞馬蕭蕭
今得出關書行塵日已遙春還遲君至共結蘭芳茗

吊柳子厚

元和乙未與故人柳子厚臨湘水為別柳
浮舟適柳州余登陸赴連州後五年余從

故道出桂嶺至前別處而君沒於南中因

賦以吊

憶昨與故人湘江岸頭別我馬映林嘶君帆轉山滅
馬嘶循故道帆滅如流電千里江離春故人今不見

秋山早發

輕陰迎曉日霞霽秋江明草樹含遠思襟懷有餘清
凝眸萬象起朗吟孤憤平渚鴻未矯翼而我已遐征
因思市朝人方聽晨雞鳴昏昏戀衾枕安見元氣英
納爽耳目變玩竒筋骨輕滄洲有竒趣浩蕩吾將行

寄陝州姚中丞

時分司
陳都

八月天地肅二陵風雨收旌旗闌下來雲日關東秋
禹迹想前事漢臺餘故丘徘徊襟帶地左右帝王州
留滯非昔老恩光榮徹侯相思望棠樹一寄商聲謳
和武中丞秋日寄懷簡諸僚故

退朝還公府騎吹息繁陰吏散秋庭寂鳥啼烟樹深
威生奉白簡道勝外華簪風物清遠目功名懷寸陰
雲衢念前侶綵翰寫中襟涼菊照幽徑敗荷攢碧濤
感時江海思報國松筠心空愧壽陵步芳塵何處尋
裴祭酒尚書見示春歸城東松塢別墅寄
王左丞高侍御之什命同作

早宦閱人事晚懷生道機時從學省出獨望郊園歸
野酌渡春水山花映岩扉石頭解金章林下步綠薇
青松鬱成塢修竹盈尺圍吟風起天籟蔽日無炎威
危徑盤羊腸連甍聳翬飛幽谷響樵斧澄潭環釣磯
日見高帝城冠蓋揚光輝白雲難持寄清韻投所希
二公如長離比翼翔太微含情謝林壑酬唱并珠璣
願余父郎潛愁寂對芳菲一聞丘中趣再撫黃金微

李觀

宿裴有書齋

卧君山窓下山鳥與我言清風何颼颼松柏中夜繁

久遊失歸趣宿此似故園林烟橫近郊溪月落古原

楊巨源

題趙孟莊

管鮑化為塵交友存如線升堂俱自媚得路難相見
懿君敦三益頽俗期一變心同襲芝蘭氣合迴霜霰
石門雲卧久玉洞蒼尋遍玉澹受旌旗梁竦勞州縣
烟鴻秋更遠天馬寒逾健願事郭先生青囊書幾卷

孟簡

擬古

劍客不誇貌主人知此心但營纖毫義肯計千萬金

勇發看鷲擊憤來聽虎吟平生貴酬德刃敵無幽深

五言古詩卷之十九

唐詩品彙十九

五言古詩卷之二十

唐詩品彙二十

新寧高棟編

正變

韓愈

唐司空圖云韓詩驅駕氣勢共掀雷決電
 ○晁氏客語云韓公文詩號杜體謂鋪叙
 而含蓄也若雖近不褻狎雖遠不肯戾該
 於理多矣○蔡寬夫詩話云退之詩豪放
 自成一家特恨其深婉未足○蘇東坡云
 書之美者莫如顏魯公然書法之壞自顏
 始詩之美者莫如韓文公然詩格之變自
 韓始○詩眼云退之詩早年亦學建安如
 孤臣昔放遂暮行河堤上重雲贈李觀等
 篇皆效建安體但頗加新奇也

秋懷詩

韓仲韶云此詩多自感其趨向不與世合故末章有避語弄觸心兵之語又以霜菊自嘆可見其一時直道之不容也○劉須溪云秋懷詩終是豪宕非選語也

牕前兩好樹衆葉光蕤蕤秋風一披拂策策鳴不已
微燈照空牀夜半偏入耳愁憂無端來感嘆成坐起
天明視顏色與故不相似羲和馭白日疾急不可恃
浮生雖多途趨死唯一軌胡為浪自苦得酒且歡喜

二

白露下百草蕭蘭共凋悴青青四墻下已度生滿地
寒蟬暫索寞蟋蟀鳴自恣運行無窮期稟受氣苦異
適時各得所松柏不必貴劉云甚怨○青青者蕭也故松柏如此耳正言似反

三

彼時何卒卒我志何漫漫犀首空好飲廉頗尚能飯
學堂日無事驅馬適所願茫茫出門路欲去聊自嘆
歸還閱書史文字浩千萬陳跡竟難尋賤嗜非貴獻
丈夫意有在女子乃多怨劉云骯髒愈高

四

秋氣日惻惻秋空日凌凌劉云惻惻凌凌亦是自道上無枝上蜩
下無盤中蠅豈不感時節耳目去所憎清曉卷書坐
南山見高稜其下澄秋水有蛟寒可噀惜哉不得往
豈謂吾無能劉云可與古詩十九首上下而氣復過之

五

離離挂空悲感感抱虛警劉云又勝露泫秋樹高蟲吊

寒夜永歛退就新懦趨榮悼前猛歸愚識夷塗汲古

得脩綆名浮猶有耻味薄真自幸劉云又怨庶幾遺悔尤

即此是幽屏葛立方韻語陽秋云此猶陶公歸去來辭覺今是而昨非之意似有所悟也

六

今晨不成起端坐盡日景虫鳴室幽幽月吐牕罔罔

喪懷若迷方浮念劇含梗塵埃慵伺候文字浪馳騁

尚須勉其頑王事有朝請

七

秋夜不可晨秋日苦易暗我無汲汲志何以有此憾

寒雞空在棲缺月煩屢瞰有琴具徽絃再鼓聽愈淡

古聲久埋滅無由見真濫低心逐時趨苦勉祇能暫

有如乘風船一縱不可纜不如覩文字舟鉛事點勘

豈必求贏餘所要石與甌

八

卷卷落地葉隨風走前軒鳴聲若有意顛倒相追奔

空堂黃昏暮我坐默不言童子自外至劉云謂童子不喻退而誦

聒吹燈當我前問我我不應饋我我不餐退坐西壁

下讀書盡數篇作者非今士相去時已千其言有感

觸使我復悽酸顧謂汝童子置書且安眠丈夫屬有
念事業無窮年劉云耿耿如在目前公

九

霜風侵梧桐眾葉著樹乾空階一片下瑋若摧琅玕
劉云甚無緊要造此奇崛謂是夜氣滅望舒霄其團青宜無依倚
飛轍危難安驚起出戶視倚楹久沈瀾憂愁費晷影
日月如跳丸迷復不計遠為君駐塵鞍

十

暮暗來客去群囂各收聲悠悠偃宵寂疊疊抱秋明
世界忽進慮外憂遂侵誠強懷張不滿弱念缺易盈

劉云時時有自得詰屈避語穿冥范觸心兵敗虞千金弃得
比寸草榮知耻足為勇晏然誰汝令

十一

鮮鮮霜中菊既晚何用好揚揚弄芳蝶爾生還不早
運窮兩值遇婉孌死相保西風蟄龍蛇衆木日凋槁
由來命分爾民滅豈足道葛立方云此則似有不遇時之嘆也

劉云甚悲惋自足有守死不易之志陳去非以為躁豈其然哉○又云十韻皆豪壯感激不類選體最後詩氣短然極耿切也

夜歌

靜夜有清光閑堂仍獨息念身幸無恨志氣方自得

樂哉何所憂所憂非我力樊澤之云此篇作於貞元中時強藩悍將可為朝廷

憂公方嘆謀計之未就雖欲憂非所力也

暮行河堤上

暮行河堤上四顧不見人衰草際黃雲感嘆愁我神
夜歸孤舟卧展轉空及晨謀計竟何就嗟嗟世與身

樊澤之云此篇與夜歌意同

長安交游者贈孟郊

長安交游者貧富各有徒親朋相過時亦各有以娛
陋室有文史高門有笙竽何能辨榮悴且欲分賢愚

葛立方云公此詩貧者文史之樂賢於富者笙竽之樂也

宿曾江口示姪孫湘

舟行亡故道屈曲高林間林間無所有奔流但潺潺
嗟我亦拙謀致身落南蠻茫然失所詣無路何能還

劉云氣短極寥寥之思非平生比也

落葉送陳羽

落葉不更息斷蓬無復歸飄颻終自異邂逅暫相依
悄悄深夜語悠悠寒月輝誰云少年別流淚各沾衣

晚菊此詩在陽山窮獨不自聊而作

少年飲酒時踴躍見菊花今來不復飲每見恒咨嗟
佇立摘滿手行行把歸家此時無與語弃置奈悲何

從仕貞元十七年始
從調京師而作

居閑食不足從仕力難任兩事皆害性一生恒苦心
黃昏歸私室惆悵起嘆音弃置人間世古來非獨今

哭楊兵曹凝陸歙州參

人皆期七十纔半豈蹉跎數出知已淚自然白髮多
晨興為誰慟還坐久滂沱論文與寤語已矣可如何

感春

偶坐藤樹下暮春下旬間藤陰已可庇落蕊還漫漫
疊疊新葉大瓏瓏晚蒼乾青天高寥寥兩蝶飛翻翻
時節適當爾懷悲自無端劉云無緊無要寫得
沉至不同末語動人

出門樊澤之云此詩在京師未
得志而作故其辭如此

長安百萬家出門無所之豈敢尚幽獨與世實參差
古人雖已死書上有其辭開卷讀且想千載若相期
出門各有道我道方未夷且於此中息天命不吾欺

送李正字儼歸湖南

長沙入深楚洞庭值秋晚人隨鴻鴈少江共葉葭遠
歷歷余所經悠悠子當返孤遊懷耿介旅宿夢婉娩
風土稍殊音魚蝦日異飯親交俱在此誰與同息偃

幽懷

幽懷不可寫行此春江潯適與佳節會士女競光陰

凝粧耀洲渚繁吹蕩人心間關林中鳥亦知和爲音
豈無一樽酒自酌還自吟但悲時易失四序迭相侵
我歌君子行視古猶視今

江漢一首答孟郊

江漢雖云廣乘舟渡無艱流沙信難行馬足常往還
淒風結衝波狐裘能禦寒終宵處幽室華燭光爛爛
苟能行忠信可以居夷蠻嗟余與夫子此義每所敦
何為復見贈繾綣在不諉

縣齋讀書

出宰山水縣讀書松竹林蕭條捐末事邂逅得初心

哀狃醒俗耳清泉潔塵襟詩成有共賦酒熟無孤斟
青竹時默釣白雲日幽尋南方本多毒北客恒懼侵
謫譴甘自守滯留愧難任投章類編帶佇谷逾兼金

貞元二十年在陽山作公嘗曰陽山天下
之窮處縣郭無居民官無丞尉小吏十餘
家審此則詩無共賦酒無共斟共誰與樂
此乎蓋是遠方來從游戶外屢常滿矣篇
末意必贈從游
者望其報章也

南溪始泛二首

榜舟南溪上上上不得返幽事隨去多孰能量近遠
陰沉過連樹巖昂抵橫坂石麤肆磨礪波惡厭牽挽
或雨飄岸漁竟就平洲飯點點暮雨秋梢梢新月偃

餘年慄無幾休日愴已晚自是病使然非由取高蹇

此詩乃長慶間公以病在告日所作故云餘年慄無幾是年十二月公薨始絕筆於

此矣○黃山谷最愛此詩有詩人句律之深意

南溪亦清駛而無楫與舟山農驚見之隨我觀不休
不惟兒童輩或有杖白頭餽我籠中瓜勸我此淹留
我云以病歸此已頗自由幸有用餘俸置居在西疇
困倉米穀消未有旦夕憂上去無得得下來亦悠悠
但恐煩里閭時有緩急投願為同社人鷄豚焚春秋

重雲一首李觀疾贈之

天行失其度陰氣來干陽重雲蔽白日炎煥成寒涼

小人但咨怨君子惟憂傷飲食為減少身體豈康寧
此志誠足貴懼非職所當藜羹尚如此肉食安可嘗
窮冬百草死幽桂乃芬芳且况天地間大運自有常
勸君善飲食鸞鳳本高翔

齷齷貞元十五年鄭滑大水此篇大抵言當世之士齷齷無能為國慮者

齷齷當世士所憂在饑寒但見賤者悲不聞貴者歎
大賢事業異遠抱非俗觀報國心皎潔念時涕汎瀾
妖姬坐左右柔指發哀彈酒肴雖日陳感激寧為歡
秋陰欺白日泥潦不少乾河堤決東郡老弱隨驚湍
天意固有屬誰能詰其端願辱太守薦得充諫諍官

排雲叫閭闔披腹呈琅玕致君豈無術自進誠獨難

孟郊

唐李翱云郊詩高處在古無上平處猶下
顧沈謝○隱居詩話云郊詩蹇澁窮僻琢
削不暇真苦吟而成觀○嚴滄浪云孟郊
之詩刻苦其句法格力可以見矣讀之令
人不歡

樂府十三首

列女操

梧桐相待老鴛鴦會雙死貞婦貴徇夫捨生亦如此
波瀾誓不起妾心古井水

塘下行

塘邊日欲斜年少早還家徒將白羽扇調妾木蘭花
不是城頭樹那栖來去鴉

遊子吟

慈母手中線遊子身上衣臨行密密縫意恐遲遲歸
難將寸草心報得三春暉

劉云全是托興終之悠然
之此千古之下猶不
忍談詩之尤不朽者

送遠吟

河水昏復晨河邊相送頻離杯有淚飲別柳無枝春
一咲忽然歛萬愁俄已新東波與西日不惜遠行人

巫山行

見盡數萬里不聞三聲猿但飛蕭蕭雨中有亭亭魂
千載楚襄恨遺文宋玉言至今晴明天雲結深閨門

靜女吟

艷女皆妬色靜女獨檢蹤任禮耻任粧嫁德不嫁容
君子易求聘小人難自從此志誰與諒琴絃幽韻重

苦寒吟

天色寒青蒼北風叫枯桑厚冰無裂文短日有冷光
敲石不得火壯陰正奪陽調苦竟何言凍吟成此章

古怨別

颯颯秋風生愁人怨離別
情兩相向欲語氣先咽

心曲千萬端悲來却難說別後唯所思天涯共明月

征婦怨

良人昨日去明月又不圓別時各有淚零落青樓前
君淚濡羅巾妾淚滴路塵羅巾常在手今得隨妾身
路塵如得風得上君車輪

古薄命妾

不惜十指絃為君千萬彈常恐新聲至坐使故聲殘
弃置今日悲即是昨日歡將新變故易變故為新難
青山有靡蕪淚葉長不乾空令後世人采掇幽思攢

劉云其聲如樂府為
近此復以苦語勝

湘妃怨

南巡竟不返二妃怨逾積萬里喪蛾眉瀟湘水空碧
劉云不苦死刑容自得大意冥冥荒山下古廟收貞魄喬木深青
春清光滿瑤席辜芳徒自薦靈意殊脉脉玉佩不可
親徘徊烟波夕

車遙遙

路喜到江盡江上又通舟舟車兩無阻何處不得遊
丈夫四方志女子安可留郎自別日言無令生遠愁
旅鴈忽叫月斷猿寒啼秋此夕夢君夢君在北城樓
塞淚無回收寄恨無回輶願為馭者手與郎回馬頭

古別曲

山川古今路縱橫無斷絕來往天地間人皆有離別
行衣未束帶中腸已先結不用看鏡中自知生白髮
欲陳去留音聲向言前咽愁絕填心曾茫茫為君說
荒郊烟莽蒼曠野風淒切處處得相隨人那不如月

劉云語雖如此極是苦思

感興六首

感懷

秋氣悲萬物驚風振長道登高有所思寒雨傷百草
平生有親愛零落不相保五情今已傷安得自能老

聞砧

杜鵑聲不哀，斷猿啼不切。月下誰家砧，一聲腸一絕。杵聲不為客，客聞髮盡白。杵聲不為衣，欲令遊子歸。

長安早春

旭日朱樓光，東風不起塵。公子醉未起，美人爭探春。探春不為桑，探春不為麥。日夕出西園，祗望花柳色。乃知田家春，不入五侯宅。

去婦

君心匣中鏡，一破不復全。妾心藕中絲，雖斷猶牽連。安知御輪士，今日翻迴轅。一女事一夫，安可移再天。

君聽去鶴言，哀哀上絲絃。

怨別

一別一回老，志士白髮早。劉云便極頓挫在富易為

容，居貧難自好。劉云亦通沉憂損性靈，服藥亦枯槁。

秋風遊子衣，落日行遠道。君問去何之，賤身難自保。

劉云古意沉靜甚有餘情

勸酒

白日無定影，清江無定波。人無百年壽，百年復如何。

堂上陳美酒，堂下列清歌。勸君金屈卮，勿謂朱顏酡。

松柏歲歲茂，丘陵日日多。君看終南山，千古青峩峩。

劉云起得似苦曲折
又極豪暢善道人意

詠懷六首

獨愁

前日遠別離昨日生白髮欲知萬里情曉卧半床月
常恐百虫鳴使我芳草歇

春愁

春物與愁客遇時各有違故花辭新枝新淚落故衣
日暮兩疋冥飄然亦同歸

秋夕貧居述懷

卧冷無遠夢聽秋酸別情高枝低枝風千葉萬葉聲

劉云
創體淺井不共飲瘦田常廢耕今交非古交貧語聞
皆輕劉云
說盡

落第

曉月難為光愁人難為腸誰言春物榮起見葉上霜
鷓鴣失勢病鷓鴣假翼翔棄置復棄置情如刀刃傷

劉云世上苦
語搜索畧盡

秋懷

秋至老更貧破屋無門扉一片月落床四壁風入衣
踈夢不復遠劉云
精語弱心良易歸商葩將去綠繚繞爭
餘輝野步賤事少病謀向物違幽幽草根生生意與

我微

失意歸吳因寄東臺劉侍御

自念西上身忽隨東歸風長安日下影又落江湖中
離婁豈不明子野豈不聰至寶非眼別至音非耳通
因緘俗外調仰寄高飛鴻

遊適九首

獨宿峴首憶長安故人

月迥無隱物况復大江秋江城與沙村人語風颼颼
峴亭當此時故人不同遊故人在長安亦可將夢求

蘇州昆山惠聚寺僧房

昨日到上方片雲掛石床錫杖莓苔青袈裟松栢香
晴磬無短韻古燈含永光有時乞鶴歸還訪逍遙場

喜與長文上人宿李秀才小山池亭

燈盡語不盡主人庭砌幽柳枝星欲曙蘭葉露華浮
塊嶺咲群峰片池輕衆流更聞清淨子逸唱頗難儔

遊終南龍池寺

飛鳥不到處僧房終南嶺龍在水長碧雨開山更鮮
步出白日上坐依青溪邊地寒松栢短石際道路偏
晚磬送歸客數聲落遙天

過分水嶺

山壯馬力短路行石齒中十步九舉轡迴還失西東
溪水變為雨懸崖陰濛濛客衣飄颻秋葛花零落風
白日捨我沒征途忽然窮

立德新居

踈門不掩水洛色寒更高曉碧流視聽夕清濯衣袍
為於仁義德未覺登涉勞遠岼雪難盡勁枝風易號
霜禽各嘯侶吾亦愛吾曹

遊終南

南山塞天地日月石上生劉云未知其下云何高峯
夜留景深谷盡未明山中人自正路險心亦平長風

驅松柏聲拂萬壑清即此悔讀書朝朝近浮名劉云

西山經靈寶觀

道士無白髮語音靈泉清青松多壽色白石常夜明
放步霽霞迢振衣華風生真文秘中頂寶氣浮四楹
一片古關踞萬里今人行上仙可一見驅策

徒西征

春風朝夕起吹綠日日深試為連州吟淚下不可禁
連山何連連連天碧嶽岑哀猿哭花死子規裂客心
蘭蕝結新佩瀟湘遺舊音死聲出剪絃坐撫零落琴

送贈九首

山中送從叔蘭赴舉

石根百尺松山眼一片泉倚之道氣高飲之詩思鮮
於此逍遙場忽奏別離絃却笑薜蘿子不同鳴躍年
送從弟歸東歸

爾去東南夜我無西北夢誰言貧別易貧別愁更重
曉色奪明月

荅郭郎中

松柏死不變丁年色青青志士貧更堅守道無異營
每彈瀟湘瑟獨抱風波聲中有失意吟知者淚滿纓
何以報知者永存堅與貞

贈鄭夫子魴

天地入胸臆吁嗟生風雷文章得其微物象由我裁
宋玉逞大句李白飛狂才苟非聖賢心孰與造化該
勉矣鄭夫子驪龍今始胎

汝墳蒙從弟楚村見贈時郊得入秦楚村
適楚

朝為主人心夕作行客吟汝水忽悽咽汝風流苦音
北關秦門高南路楚石深分淚洒白日離腸遶青岑
何以寄遠懷黃鶴能相尋

留別知己

共照日月影獨為愁思人劉云然痛豈知鷓鴣鳴瑤
草不得春一片兩片雲千里萬里身雲歸高山陽身
寄江之濱棄置復何道楚情吟白蘋

感別送叔簡校書再科東歸

長安車馬道高枕結浮陰下有名利人一人千愁心
黃鶴多遠勢滄溟無近濤怡怡靜退姿冷冷思歸吟
菱唱忽生聽芸書迴望深清風散言談餘花綴衣襟
獨恨魚鳥別一飛將一沉

與韓愈李翱張籍別

朱絃奏離別華燈少光輝物色豈有異劉云亦不料

人心願將違客程殊未已歲華忽然微秋桐故葉下
寒露新鴈飛遠遊豈重恨送人念先歸夜集羣羈鳥
晨光失相依馬跡達川水鴈書還閨闈常恐親朋阻
獨行知慮非

上河陽李大夫

上將秉神略至兵無猛威三軍當嚴冬一撫勝重衣
霜劍奪衆景夜星失長輝蒼鷹獨立時惡鳥不敢飛
武軍鎖天關河橋紐地機大軍奚以安守此稱者稀
貧士少顏色貴門多輕肥試登山岳高方見草木微
山岳恩既廣草木心皆歸

哀傷二首

李少府廳吊李元賓遺宇

零落三四字忽成千萬年那知冥冥客不有補亡篇
斜月吊空壁旅人難獨眠一生能幾時百慮來相煎
戚戚故交淚幽幽長夜泉已矣難重言一言一潛然
覽崔爽遺文因紆幽懷崔沒南旁

墮淚數首又悲結千里墳蒼冥且留我白日空遺君
仙鶴未巢月衰鳳先墜雲清風獨起時舊語如再聞
瑤草罷歲蕤桂花休氛氲萬物與我心相感哭江濱
悼吳興張衡評事

君生霽水清君沒霽水渾空令骨肉情哭得白日昏
大夜不復曉古松長閉門琴絃綠水絕詩句青山存
昔為芳春顏今為芳草根獨問冥冥理先儒未魯言

劉云語不盡白又高拒之不可解者



